

陝西通志




第五十九卷

人物五

勇畧下

DS
793
S4555
1735
V-59



陝西通志第五十九卷

人物五

勇畧下

五代

王檀字衆美京兆人少事梁太祖爲小校尚讓攻梁戰尉氏門檀勇
出諸將太祖奇之遷踏白副指揮使從太祖破魏內黃復從朱珍
攻徐州獲其將一人攻王師範以一軍破其密州拜密州刺史太
祖卽位遷保義軍節度使潞州東北面招討使晉兵圍邢州太祖
欲自將救之檀止太祖請拒敵力戰卒全邢州以功加同平章事
進封瑯琊郡王貞明元年徙匡國是時莊宗取魏博檀謂晉兵悉
在河北檀以奇兵西出陰地襲太原不克而還徙鎮天平檀嘗招
納亡盜居帳下帳下兵亂入殺檀諡曰忠毅

五代史本傳

孫德昭五原人爲神策軍指揮使光化三年劉季述廢昭宗幽之東
宮宰相崔弘謀反正陰使人求義士可共成事者德昭乃與孫承
誨董從實應引天復元年正月朔季述將朝德昭伏甲士道旁邀
其輿斬之分索餘黨皆盡昭宗反正以功拜靜海軍節度使號扶
傾濟難忠烈功臣與承誨等皆同平章事圖形凌煙閣留京師號
三使相恩寵無比時崔弘謀欲誅宦官外交梁以爲恃冬十月宦者
韓全誨劫昭宗幸鳳翔承誨從實皆從德昭獨率兵衛弘引及百官
保東街趨梁兵西梁太祖至京師表同州留後梁兵圍鳳翔德昭
以兵八千屬太祖昭宗東遷拜左衛上將軍以疾免太祖即位以
烏銀帶袍笏名馬賜之疾少間以爲左衛大將軍末帝立拜左金

吾大將軍卒

五代史
本傳

袁建豐不知其世家晉王討黃巢至華陰闌得之時方九歲愛其俊

爽收養之長習騎射爲鐵林都虞候以功遷突陣指揮使從莊宗破夾城戰柏鄉入魏取衛磁沼三州拜沼州刺史擊梁將王千斬首千餘級獲其將校七十餘人遷相州刺史從戰胡柳指揮使孟謙據相州叛建豐還討平之徙隰州刺史病風廢明宗即位以舊恩召還京師親幸其第撫慰甚厚卒贈太尉

五代史本傳

宋

張保續字嗣光萬年人父洪唐左武衛上將軍保續梁貞明中補臨濟尉後唐天成初改贊善晉天福中領通事舍人契丹入寇杜重威李守貞等連兵禦之命保續馳騎往來軍中論機事大破敵於陽城使還充西上閤門副使周祖革命詔爲東上閤門副使從平慕容彥超世宗即位從征淮南壽州納款遣保續先往撫慰以功遷判四方館事從平瓦橋關奉使吳越宋初遷衛尉卿保續性介

直好儉素善宣贊辭令累使蕃國不辱命從征李筠以足疾歸京

師卒

宋史本傳

杜漢徽長安人父阿孫爲太原威勝軍使漢徽有膂力善騎射年十七仕後唐武皇爲直隊長晉開運二年戍深州破契丹於樂壽殺獲甚衆漢初從高行周討杜重威於鄴屢爲流矢所中身被重創猶力戰觀者壯之周世宗征劉崇漢徽有戰功補都虞侯宋初領茂州刺史從平李筠又從平李重進錄功居多建隆三年出爲雄武軍使知屯田事是冬被病即以符印授通判宋鸞請告歸卒

宋史

本傳

崔翰字仲文萬年人少有大志風姿偉秀太祖見而奇之以隸麾下從周世宗征淮南平壽春取關南以功補軍使開寶九年領端州刺史太平興國四年從征太原總馬步諸軍攻城流矢中其頰神

用事邊臣欲以謀間之有僧王光信者趨勇善騎射習知蕃部山川道路世衡出常使爲鄉導數盪族帳奏以爲三班借職改名嵩世衡爲蠟書遣嵩遺剛浪陵言朝廷知王有向漢心剛浪陵得書大懼執嵩歸元昊疑剛浪陵貳已錮嵩弇中使其臣李文貴以剛浪陵旨報世衡世衡召文貴至諭以國家寬大開納意縱使還報元昊得報出嵩禮之甚厚遂稱臣如舊世衡聞野利已誅爲文越境祭之龐籍疏嵩勞具言元昊未通時世衡畫策遣嵩冒艱險間其君臣遂成猜貳因此與中國通請優進嵩官遷三班奉職後又進侍禁閣門祇候

宋史神
世衡傳

种誼字壽翁

世衡子

熙寧中從高遵裕復洮岷平山後羌爲都監自蘭

州渡河討賊斬首六百元祐初知岷州鬼章入寇結屬羌爲內應誼與姚兕合兵出討羌迎戰擊走之追奔至洮州亟進攻晨霧蔽

野誼曰吾軍遠來乘此可一鼓下也霧霽先登者已得城鬼章就執拜西上閤門使康州刺史徙知鄜州夏人犯延安趙禹使誼統諸將敵聞誼至皆潰去延人謂得誼勝精兵二十萬進熙河鈐轄知蘭州蘭與通遠皆絕塞保障不相接誼請城李諾平以扼衝要遷保州團練使卒誼倜儻有氣節蒞軍嚴整每戰未嘗負敗

衡傳

宋史种世

李浩字直夫本綏州人務學通兵法以父定廕從軍破儂智高韓絳城囉兀領兵戰賞堡嶺川殺其首領訛革多移斬首千三百餘級積官廣西都監著安邊策從章惇討舒光貴破盈口柵蠻賊田元猛元喆合拈矜拒官軍浩分兵擊之殺拈矜降元猛元喆城懿州進破黔江蠻復城黔江擢熙河鈐轄李憲討山後羌浩將古軍至合龍嶺會戰遣降羌乞噓輕騎突敵帳俘獲冷雞朴李密斬賊三

千遷副總管知河州安撫洮西五路大舉浩將前軍復蘭州遷知
蘭州兼熙河涇源安撫副使哲宗即位拜忠州防禦使卒

宋史
本傳

張呂府谷人爲牙將有膽畧善騎射天聖中西夏觀察使阿遇有子
來歸阿遇寇麟州虜邊戶約還子歸所虜麟州還其子而阿遇背
約安撫使遣呂詰問呂徑造帳中以逆順諭阿遇悉歸所虜州將
補爲來遠砦主手殺僞首領奪其甲馬時年十八名動一軍元昊
犯鄜延呂從折繼閔破浪黃党兒兩族斬僞軍主教保時賜軍衣
至麟州不得前呂往護之至者耆浪遇賊接戰流矢貫雙頰呂拔
矢鬪愈力奪馬十二匹而還賊攻府州城西南隅卑下賊將登呂
乘陴大呼搏賊飛矢中右目下身被三創晝夜督守圍解以勞遷
右班殿直爲麟州府道路巡檢至深栢堰遇賊分兵追擊斬首百
餘級近郊民田秋成未敢獲呂以步卒九百人護之大敗賊於龍

門川通麟州糧道破賊於栢子砦改左班殿直內侍宋永誠傳詔
砦下出護永誠遇賊三松嶺賊矢中右臂猶躍馬左右馳射諸將
乘勝而進賊將棄潰改西頭供奉官累遷洛苑使前後數中流矢
創發臂間卒

宋史本傳

王凱字勝之

全斌曾孫

祖審鈞嘗爲永興軍駐泊都監遂家京兆饒於財

凱散施結客日馳獵南山下以踐蹂民田捕至府時寇準守長安
見其狀貌奇之爲言全斌取蜀有勞而審鈞以忠義死當錄其孤
遂以爲三班奉職元昊反徙麟州都監嘗出雙烽橋遇夏人破之
又破龐青黃羅部再戰於伺候峰遷麟州路緣邊都巡檢使入兔
毛川賊衆三萬凱以兵六千陷圍矢中面鬪不解斬首百餘級賊
自蹂踐死者以千數後爲并代鈐轄夏人二萬寇青塞堡凱出鞋
邪谷轉戰四十里至杜貼川大敗之前後斬首三百餘級獲馬牛

器械以數千計經畧使明鑄言凱在河外九年有功遂領資州刺史累遷涇州觀察使又徙秦鳳路帝諭以唃氏木征交易阻絕頗有入寇之萌宜安靜以處之凱至以恩信撫接遂復常貢召拜侍衛親軍馬軍副都指揮使卒諡莊恪子緘緘子詵字晉卿能詩善畫官至留後

宋史王全斌傳

延安老校寶元元年西虜圍延安七日鄰於危者數矣范雍為帥憂形於色有老軍校出自言曰某邊人遭圍城者數次其勢有迫於今日者虜不善攻卒不能拔今日萬萬無虞若有不測某甘斬首范嘉其言壯人心亦為之小安事平此校大蒙賞拔言知兵善料敵者首稱之或謂之曰敢肆妄言萬一言不應須伏法老校笑曰君未思也若城果陷何暇殺我聊欲安眾心耳

夢溪筆談

李庠字彭年唐郇王裔萬年人性純厚長於吏事父尚書在真定斷

獄有令名庠多助焉佐政萬年善室訟源趙元昊反陳禦敵之策甚備仁宗嘉納之在河東自分諸將占地總兵使應機制敵各專其責籍戍兵以時更代人皆便之涇原歲饑主計者以乏軍儲不蠲民租庠請減邊兵就食內地租遂得蠲人服其達環慶羌衆逼境四路都帥遣使促兵擊賊庠請堅壁清野以困之帥用庠言賊果去其臨事應變類此

賈志

姚兕字武之五原人補右班殿直爲環慶巡檢與夏人戰一矢斃其酋衆潰因乘之遂破蘭浪敵大舉寇邊兕駐荔原堡據險張疑兵伺便輒出有悍酋臨陣兕射中其目斬首還明日來攻益急兕手射百人遣子雄引壯騎掩其後所向必克敵度不可破乃退攻大順城兕復往救轉鬬三日斬級數千卒全二城慶軍叛兕以親軍守西關下馬與語皆感泣誓無復叛遷爲路都監攻河州飛矢貫

耳戰益力河州既得又爲鬼章所圍兕乃往擊隴宗圍遂解累遷
皇城使從攻交趾破乞弟遷東上閣門使徙熙河與种誼合兵討
鬼章於洮州破六通宗城夜斷浮橋援兵不得渡遂擒鬼章拜通
州團練使卒於郿延總管

宋史本傳

姚麟字君瑞兄兕攻河州時俱在兵間中矢透骨鏃留不去以彊弩
出之笑語自若積功至皇城使爲秦鳳副總管從李憲討生羌擒
冷雞朴轉英州刺史元豐西討以涇原副總管從劉昌祚出戰勝
於磨礪監督諸將討堪哥平經畧廬秉上其功擢威州團練使歷
都指揮使節度建雄定武軍檢校司徒卒贈開府儀同三司麟爲
將沈毅持重不少縱捨宿衛士嘗犯法詔釋之麟杖之於庭而後
請拒詔之罪故所至肅然

宋史姚兕傳

王文郁字周卿新秦人爲府州巡檢韓琦薦其才加都監熙寧討夏

國文郁敗之吐渾河其將香崖夜遣使欲舉衆降旦至衆情忽變
譟以出文郁擊之追奔二十里據險大戰矢下如雨文郁渡河謂
吏士曰前強敵後天險韓信驅市人且破趙况爾曹皆驍勇耶士
感奮進擊夏人大潰遷通事舍人夏人踰屈野河掠塞上文郁追
至長城坂盡奪所掠而還神宗召見知文郁善左射閱肆殿庭文
郁九發八中遷知麟州夏衆踐稼襲敗之未幾爲熙河將李憲討
靈武文郁得羌戶萬餘遷鈐轄夏人圍蘭州已奪兩關門文郁募
死士持短兵突賊即掃營去擢知蘭州夏人大入文郁舉城禦之
殺傷如積圍解加榮州團練使知河州築安西城金城關進秦州
防禦使冀州觀察使卒

宋史
本傳

游師雄字景叔武功人學於張載第進士趙高帥延安辟爲屬時夏
人擾邊諸城兵力咸弱高患之師雄請發義勇以守多聚石城上

夏人知有備不敢入歲饑行諸壘賑貸計口受糧人無殍亡元祐
初吐蕃寇邊構夏人爲亂詔師雄行聽便宜從事師雄分兵爲二
姚兕將左种誼將右兕破六逋宗城斬首千五百級誼破洮州擒
鬼章及大首領九人斬首千七百級後遷陝西轉運判官夏人侵
涇原復入熙河師雄言宜於定西通渭之間建三柵以固藩籬詔
付范育皆如議拜祠部員外郎召詣闕哲宗數訪邊防利病師雄
具紹聖安邊策上之出知邠州徙知陝州卒師雄慷慨豪邁有志
事功議者以用不盡其材爲恨

宋史本傳

姚雄字毅夫

兕子五原人

少勇鷙有謀年十八佐父征伐從討金湯以百

騎先登奪隘官累左騏驎使紹聖中章綰城平夏雄部熙河兵策
援夏人傾國來與之鏖鬪流矢注肩戰采厲賊引却追躡大破之
斬首三千級俘虜數萬城成擢秦州刺史明年虜攻平夏勢銳甚

雄與弟古合兵却之徙知會州遷熙河鈐轄羌人攻湟鄯詔雄援之自鄯至湟四戰皆捷遂築安鄉關通湟水漕運商旅負販入湟者始絡繹於道加復州防禦使進左金吾衛上將軍以檢校司空一奉寧節度使致仕卒諡武憲

宋史姚兕傳

种師道字彛叔

世衡孫

以廕補三班奉職知西安州夏人侵定邊築佛

口城率師夷之遷防禦使知渭州督諸道兵城席葦土賦工敵至堅壁葫蘆河師道陣於河澍陰遣偏將曲克徑出橫嶺揚言援兵至敵方駭顧楊可世潛軍軍其後姚平仲以精甲衝擊之敵大潰卒城而還詔帥兵征臧府城期旬日必克敵守備甚固列校有自休者立斬之衆股慄慄而登城即潰從童貫為都統制貫欲伐燕師道諫不聽責為右衛將軍致仕金人南下趣召之加少保師道至洛陽聞幹離不已屯京城下揭榜沿路言种少保領兵百萬來

金人懼徙砦增壘自衛欽宗聞其至喜甚拜少傅京畿兩河宣撫使金使王汭在廷望見師道拜跪如禮帝笑曰彼爲卿故也師道請緩金歲幣使彼情歸扼而殲諸河執政不可金師退罷爲太一宮使御史中丞許翰奏師道尚可用加少師進太尉河北河東宣撫使師道請合關河卒屯滄衛孟滑備金兵再至朝論敵甫退不宜勞師既而召還太原陷又使巡邊亟上疏請幸長安以避其鋒大臣以爲怯復召還既至病卒諡忠憲

宋史种世衡傳

張宗顏字希賢延安人補三班借職積官至涇原副將張俊選爲統領從俊討湖西寇秀州軍校徐明以城叛宗顏夜襲其城明遁遷御前中軍統制金人攻明州宗顏破其前軍從俊討李成與成將馮進戰玉隆觀敗之以兵襲擊淮北遷崇信軍承宣使僞齊入寇張俊檄宗顏自泗州爲後繼與劉猷遇於李家灣大破之猷僅以

身遁擢知廬州總帥事敵數百騎至城下宗顏以百騎遇之敵退

紹興九年卒諡壯敏

宋史本傳

解元字善長保安軍人起行伍隸韓世忠麾下擢偏將世忠出下邳金兵大至士皆駭愕元領二十騎擒其生口俄逢騎數百身自陷陣橫刺酋長墜馬餘皆遁去苗傅劉正彥之變從世忠追賊擒於浦城金人攻浙西世忠以海艦橫截大江金人出小舟以長鈎板艦元躍入敵舟以短兵擊殺數十人擒其千戶授統制前軍討閩寇范汝為轉討湖外諸盜時劉忠據白面山元率兵五百四面並進賊平改相州觀察使紹興四年金人偽齊合兵入侵元屯承州遣百人伏要路百人伏嶽廟自以四百人伏路隅金人走城下伏發進退無路元追獲四百八十人時城中兵不滿三千金萬戶黑頭虎造城下元微服出偽若降者金人稍懈俄伏發擒黑頭虎金

兵四集元戰却之從世忠出下邳以數百騎破敵伏兵授保順軍承宣使畧地淮陽騎三百當敵騎數千元揮戈大呼轉戰自辰至午敵退成列而還進保信軍節度使

宋史本傳

金

龐迪字仲由延安人少倜儻喜讀兵書習騎射應募隸涇原副將破賊有功授保義郎從百餘騎行山谷遇夏人數千衆懼請避迪躍馬犯陣敵皆披靡擢爲正將權知懷德軍夏人合軍五萬薄懷德迪開門待之夏人不敢入因以數千騎分門突出遂破之斬獲甚衆改華州防禦使天眷元年除永興路兵馬都總管知京兆府徙臨洮尹陝右大饑流亡四集迪開渠溉田流民居民各得其所七年除慶陽尹以最聞正隆元年遷鳳翔尹海陵征斂煩急官吏因緣爲姦迪不加威督而力役均人情大悅大定初遷南京路都轉

運使以省事惜費安靜為政徙絳陽軍節度使卒迪性純孝父疾仰天泣禱刲股作羹由是獲安昆弟析家財迪盡以與之官爵之

廕率先諸侄

金史本傳

楊仲武字德威保安人父遇以勇聞關西為宥州團練使宋末仲武謁經畧使王庶用為先鋒婁室入關與鄭建充俱降為環慶路兵馬都監皇統初復陝西將兵戍鳳翔屢却宋軍除知寧州關中薦饑境內盜賊縱橫仲武悉平之遷同知臨洮尹改同知河中府臨洮地接西羌與木波雜居邊將貪暴木波苦之遂相率為寇掠仲武前治臨洮從數騎入其營諭之羌人喜悅寇掠遂息至是木波復掠熙河主帥使人諭之不肯去詔復遣仲武及至責以負約對曰邊將苦我今幸見公願終身不復犯塞乃舉酒酹天折箭為誓仲武因以卮酒飲之羌人羅拜而去大定三年除武勝軍節度使

改陝西西路轉運使卒

金史本傳

完顏斜烈名鼎字國器

陳和尚兄豐州人

年二十以善戰知名自壽泗元帥

轉安平都尉鎮商州威望甚重敬賢下士有古名將風

金史完顏陳和尚傳

元

謝睦歡豐州人以貨雄鄉曲間大兵南下轉客兀刺城太祖攻西夏

過其城睦歡與其帥迎降從攻西京睦歡力戰先登連中三矢仆

城下太宗命軍校拔矢縛牛剗其腸裸而納諸牛腹中良久乃甦

誓以死報每遇敵必身先之官至太原路金銀鐵冶達魯花赤

元史

謝仲溫傳

郭寶二字玉臣華州人通天文兵法善騎射金末封汾陽郡公引軍

屯定州會木華黎軍至寶玉舉軍降引見太祖問取中原之策寶

玉對曰中原勢大西南諸蕃勇悍宜先取之以圖金又言建國之

初宜頒行令帝從之授抄馬都鎮撫從木華黎取永清破高州降
北京龍山復破太原平陽諸州縣從帝討契丹遺族破其兵三十
餘萬收別失八里別失蘭等城次忽章河西人列陣戰方酣寶玉
疾呼曰西陣走矣其兵果走追殺幾盡次暗水河敵陳船河中寶
玉令發火箭射其船一時延燒乘勝直前斬大將佐里收馬里四
城從拓栢速不台二先鋒收契丹渤海諸國有功累遷斷事官子
德海德山德山以萬戶破陝州攻潼關卒德海字大洋亦通天文
兵法金末爲謀克擊宋將彭義斌於山東敗之大軍至乃出降從
拓栢西征踰雪嶺西北萬里進軍次答里國平之還至崢山吐蕃
曰紇反破之從元帥濶濶入關中金人閉關拒守德海斬關入破
南山八十三寨與金將武仙軍十萬遇於白河斬首二萬餘級德
破金軍於鄧至均州辛卯春金人圍之我軍衝圍而出金人死

三十餘萬又破金將合喜兵於中牟完顏斜烈帥軍來戰先登破之以功遷右監軍壬辰破金師於黃龍岡癸巳取申唐二州甲午一河南叛德海討之砲傷其足以疾卒

元史本傳

王檄字巨川號縣人父霆金麟遊主簿檄性倜儻元帥高琪薦授副統軍太祖南下兵敗見執義而釋之授都統從大軍破紫荊關取涿易保州中山軍次雄州孫吳堅守不下檄入城諭以禍福吳遂降授宣撫使從南征下古北口攻薊雲順等州所過迎降得漢軍數萬圍中都中都降入覲授銀青榮祿大夫時都城廟學燬於兵檄復立之春秋率諸生行釋菜禮從征西夏及秦州夏人進撤橋梁軍阻不得前檄夜督士卒運木石比曉橋成軍乃得進命領省中都盜起掠近縣檄曰都城根本之地不可無備引水環城人心稍安遣男守謙率諸軍討諸盜平之從征關中長驅入京兆進克

鳳翔從攻汴京奉命持國書使宋宋人甚禮重之檄前後凡五往以和議未決隱憂致疾卒

元史本傳

郭侃字仲和

德海子

弱冠爲百戶驚勇有謀畧金將伯撒取衛州侃拒

之破其兵四萬遂渡河襲金主至歸德攻汴西門金元帥崔立降以下德安功爲千戶從宗王旭烈兀西征西城平世祖即位上疏陳建國號築都城立省臺興學校等二十五事及平宋之策後皆如其策中統二年擢江漢大都督府理問官三年益都李壇及徐州總管李杲哥俱反宋夏貴來犯邊史天澤薦侃召入賜尚衣弓矢馳至徐斬杲哥杲哥弟驢馬復與夏貴來擾邊境侃出戰斬首千餘級至元五年濟南胡王反討平之七年彰德趙當驢反又平之帝以侃習於軍務擢爲萬戶從軍下襄陽江南平知寧海州居一年卒侃行軍有紀律野饘露宿不入民舍所至興學課農吏民

畏服元史郭寶玉傳

任進鄜州人至正間爲鄜坊康定軍節度使勇畧著聞朝野倚重及沒朝廷禮葬焉子貴至正末克征南統軍大元帥屢立戰功邊疆

寧謚馬志

明

車泰字子陽華州人洪武中歲貢除戶科給事中歷遷山東叅政靖難兵起進攻德州泰與鐵鉉協力拒守不下隨機應變成祖終莫能克進左布政使永樂初以前事逮京念爲高皇帝侍從舊臣免問調四川左布政賈志

郭繼宗洵陽人洪武初從軍有開造功守紅岩關禦紅巾賊之亂授南京鎮南衛百戶成化中改金州守禦千戶所洵陽志

林嵩邠州人國子生任御史成祖渡江言事忤旨謫戍廣西交趾叛

以嵩徃征之嵩夙嫻韜畧卒能底定授交州府同知歷陞叅政

賈志

石岩字廷舉渭南人嫻武畧善騎射洪武中成大寧寬河衛尋從文

皇舉靖難兵立功陞本衛千戶永樂中扈從北征至元冥河戰退

本雅失里陞本衛指揮僉事以忠謹見稱從子亨嗣

渭南縣志

亨不學

英果有膽氣善騎射從子彪揮斧挽強亦不在亨後每出戰亨先

登彪從之亨累功都指揮使彪亦授大同衛鎮撫正統中亨遷都

督僉事爲大同左叅將守萬全彪亦遷都指揮已巳之變亨繫獄

寇至京城下景帝赦之使將兵亨與彪出安定門馳突截殺寇却

而西亨等追擊城西寇復却而南追及清風店寇懼且出倒馬關

亨使給寇皆反戰亨彪復擊殺數百人盡棄其羊馬輜重而還亨

封武清伯尋進侯總京營兵彪陞都督僉事爲大同左叅將諸子

並陞千戶景帝不豫亨陰約徐有貞等迎上皇復位論功封忠國

公仍理後軍都督府事召彪爲都督同知充遊擊將軍凡以迎駕

奪門論功者前後四千人亨日於上前言事上心漸厭亨其始有

請盡見從無何可八九又無何可四五又無何可二三耳彪以亨

功一再遷爲後軍右都督天順元年以遊擊將軍遇寇磨兒山大

敗之封定遠伯又明年寇屯賀蘭山後使彪往彪連戰安邊營追

至昌平墩大敗之轉戰六十餘里交鋒數十合斬酋鬼力赤平章

召彪還進爵爲侯彪在大同既誣陷都御史年富復數侮其總兵

總兵因彪嘗奏城威寧海子遂爲流言誣彪有異志上疑之下彪

獄予亨病告凡附亨進者皆貶黜四年春遂杲上章言忠國公怨

益甚遂命籍亨彪家及其莊田之在渭南者亨死獄中彪伏誅

藏山亨從孫進士俊者素有才名亦被收時人冤之

渭南縣志

鞏固洋縣人宣德中知四川珙縣有勇畧生擒賊首阿具田等夷人

畏憚不敢近城

四川通志

楊洪字宗道漢中衛百戶

馬志

洪永樂初調開平八年從征追虜至幹

難河洪熙元年追虜至大松林有功陞正千戶宣德中累功陞指

揮使尋充遊擊將軍至瓦房嶺大破虜陞僉事正統元年副都督

李謙守懷來追敗虜至三义口其冬擊虜回回墓大破之三年追

敗虜伯顏山遷都指揮同知尋進都指揮使四年追叛虜阿木狼

進都督府僉事七年充左叅將敗虜北只嶺進同知九年掛鎮朔

將軍印充總兵鎮宣府洪爲人機變敏捷尚權譎善於用奇制勝

虜畏之呼爲楊王見洪旗幟相戒不敢出入十四年土木師潰虜

僞上旨予洪書誘使開門迎上洪謹閉不出縛使者送京師進封

昌平伯虜犯京師洪率六萬騎入援追虜至金坡鎮斬首四百進

昌平侯景泰二年卒諡武襄洪爲將敬慎強敵不怯戰勝不驕宣

正間稱名將子傑嗣侯庶子俊以擒逆聞喜寧功陞右都督從子
四人能都督同知信都督僉事仁錦衣衛指揮僉事智開平衛指
揮使能後封武強伯信封彰武伯明史成化元年冬毛里孩寇陝
西彰武伯楊信禦之遁去紀事本末

傅瑛綏德衛指揮使屢立邊功成化元年設鎮立堡命瑛督工一年
以功陞都指揮僉事八年守定邊授都指揮同知後捷於紅鹽池
陞都指揮使二子釗鐸皆以邊功顯釗承父蔭解大同圍有功授
都指揮僉事協守寧夏累官副總兵好文愛士諳達邊務正德初
統延綏義勇軍往來破敵敵不知所備號為驍傑鐸長於謀勇能
以寡勝衆平洛川賊授都指揮協守寧夏大樹勲績延綏志

王信字君實南鄭人姓譜成化二年二月特擢鎮守荆襄王信為都指
揮同知劉千斤之亂荆襄震驚信度房陵險要自率數十騎往據

之調集兵民不滿千人賊四千餘突至圍城攻之援絕信多張旗

舉火日夜不息歷四旬間以死士出城五六里舉火礮賊以為援

兵驚潰信追擊之大利

紀事本末

信沉毅簡重被服儒素出鎮三十年

笥無華衣廐無肥馬鈴閣之下寂無人聲

廉平錄

神英字景賢延安衛指揮使驍勇敢戰累有斬獲功成化弘治間以

總兵官守寧夏延綏宣府大同歷四鎮正德初封涇陽伯

延綏志

正

德五年命涇陽伯神英率師討寘鐸

明紀輯畧

彭清字原潔綏德衛指揮弘治中擢副總兵守甘肅有功代劉寧為

總兵官清久鎮西陲威名甚著性廉潔遭母及妻妹四喪貧不能

歸葬卒之日命其子不得受賻贈帝特命撫臣發帑金資送歸里

延綏志

土番蘭芽守哈密副總兵彭清統銳卒乘夜倍道襲蘭芽師

入哈密得牛羊三千斬級六十西域自是頗憚中國

紀事本末

曹雄西安左衛指揮累官都督同知寘鐸反雄趣兵赴靈州收船約諸鎮渡河討之大張兵威七日而會者數萬仇鉞藉其聲勢盡平

逆黨雄拜鎮西將軍

馮志

楊宏西安左衛指揮使廉勇過人博覽羣史成化時以薦陞都指揮守固原請築紅古城募衆屯田扼入寇路掌陝西都司事平漢南盜斬首八百餘級陞總兵鎮松潘平大盜鄢本恕廖林子等斬首數百級降二萬人以功累陞南京都督召入後府改守淮揚總督漕運剔蠹清逋增制淺船省費五十萬召爲南京中府宏居官中外五十年臨事多算以智將稱

賈志

王緒華陰人弘治己酉舉人正德中爲諸城縣令流賊攻城下親率諸邑兵民逆戰斬賊首賊遁一境獲全及論功當事索賄弗叙竟拂衣歸諸城祠之

賈志

劉總宜川人卓犖不羣慷慨多大畧善騎射正德間以貢生任盧氏縣令時大盜劉六劉七等攻城掠邑繼先期斂民入城堡四境獲全復領本邑募丁夜襲破賊以軍功上於朝會疾大作而歸總子廷瑚嘉靖初任延津令承天之役所過郡邑無一獲全廷瑚預置高樓凡飲食供帳先以號帖投諸司必諸司遣人至樓下驗號帖乃給之一時上下皆得飽食上嘉之手書一等官員額其縣堂總祖父多隱德嘗拾遺金二百還其主積德之家必以劉氏爲首稱

賈志

時源綏德衛指揮爲人質實廉能驍勇絕倫以邊功歷鎮三秦時蜀賊作亂遷源爲平賊將軍督各鎮兵討平之又於陽武縣征劉六

劉七有功

延綏志

馬昊改姓鄒其先句容人後徙居長安長身驍捷善騎射舉弘治乙

朱進士爲御史擢僉事以直言屢謫因蜀盜藍鄙叛合四省兵討之擢昊以僉事治兵斬將受降遷秩副都御史襲人普法等僭號攻劫擒誅之累遷右都御史

長安志

徐璉朝邑人弘治進士由戶部郎中出爲袁州知府宸濠變起璉起兵會王守仁於樟樹鎮同臨江戴德孺贛州邢珣等各將精兵破宸濠於黃家渡獲首功事定遷江西右叅政世宗錄功增秩二等

明史稿
列傳

王勛榆林衛指揮爲人英邁騎射出衆以軍功爲都督僉事鎮守延綏弟劾嘉靖中爲寧夏總兵敗吉囊於柳門明年敵以十萬騎寇邊復連破之累功進左都督劾言行謹飭用兵兼謀勇名振西陲

卒諡襄武

延綏志

桑綦字德美長安人父濟邦正德中舉人仕陽城令清介絕俗綦嘉

靖已酉舉於鄉初仕杭州府通判時礦徒爲亂募招降其衆復殲其首孽擢同知太原府會雲中警甚以兵援廣武被圍者三日夜蒸出奇衝矢圍解捷聞賜金幣遷按察僉事巡轄遼左以終養歸籍

長安志

劉鸞白水人舉人正德五年知東明縣時流賊攻東門二日幾陷鸞登城督戰幾百餘合項刺二創神色不變巡守愈勵乘風縱火賊圍始解活數萬民監司以上聞有綵緞之賜

畿輔志

楊伸同官人任山東安東衛指揮僉事驍勇諳韜畧正德間流賊起奮不顧身斬首獲虜陞指揮使進階昭勇將軍

馬志

王縉西安左衛人以指揮僉事戰清水河積功遷固原守備旋充右叅將分守延綏戰凉水灣攻孟家塔破高松砦援神木山擢副總兵協守延綏拜征西將軍總兵官鎮守寧夏以義渠之亂罷

延綏志

孟孝臣榆林人蘭州叅將質朴有膽畧與士卒同甘苦火篩剽掠內地孝臣奉檄策應寧河一捷幾破敵膽復潛師馳護郡城敵齧指不敢近又帥兵奪獲牛馬甚夥火篩所至孝臣輒尾擊之屢立戰

功

延綏志

何棟字伯直長安人正德辛巳進士嘉靖初授監察御史以疏劾興邸從龍宦豎王斌等出爲宜興知縣俄擢工部都水郎中遷右通政轉左僉都御史巡撫大同時有星孛於井之末度朝議僉謂永嘉相公輔政之應棟獨上言井之末度乃大同分野彗色蒼赤兆主兵變期年後大同當有圍城蹶將之災聞者誣爲黨附棟至大同選將扼險虜犯高山站等處督兵力戰連破之俘級二百二十人捷聞賜書褒予金帛言者仍以星疏論不已有詔謫蜀藩左叅政遂乞終養歸二十九年八月虜犯京師即家起右副都御史提

督薊州軍務明年加兵部右侍郎咸寧侯仇鸞請伐朶顏三衛棟
力爭以爲不可上卒用棟言寢兵是年以生擒哈舟兒等進左侍
郎加賜金帛明年再擒虜謀孫黑子等進右都御史兼兵部左侍
郎三十二年以疾乞休

西安府志

黃雲字叔卿咸寧人由進士任工部主事監淮浙稅羨餘悉貯郡藏
歷任山西憲副兵備岢嵐路當偏關寇出沒無常乃浚城隍募間
謀師出常捷懋績鴻功具載實錄卒於官

咸寧志

沙金延安人從行伍討流賊擒獲賊首累立邊功

馬志

嘉靖間陞咸茂

叅將廉平不苛雅有儒風每日戴星而出寒暑無間每坐至夜分
時呼將校講求平蠻機宜以忠勤清慎勉之自奉不務華美去官
之日行李蕭然

四川通志

梁震榆林衛指揮使忠勇好讀兵書累功進延綏總兵嘉靖十五年

改大同

延綏志

先是大同軍亂殺巡撫張文錦鎮巡官每以甘言慰

勞之震拜命率家丁五百人馳至雲中下令曰我無爾陵爾無我

叛王法軍令具在我不敢破紀綱悞國其家丁向大同兵語曰爾

敢蔑視主將者恃衆耳兒郎輩無一不當百五步內恐爾不得用

其衆由是軍中肅然莫敢譁者震與卒同甘苦身為率先修復五

堡邊境蘇息卒諡曰武壯

明紀輯畧

姜應熊字周佐榆林人弱冠舉武科攝本衛指揮使當時器重之累

陞甘肅副總兵掛征西將軍印鎮寧夏嘉靖三十二年寇犯延綏

應熊潛師來援寇敗於金湯川秋犯平羅城應熊復多首功捷聞

實授都督同知三十四年以黑疙瘩功授右都督調薊遼會北兵

大舉薄居庸城陵京震動時我兵方數萬敵見兵少圍之數重應

熊搏戰潰圍出復轉戰數十里至營創甚檢之得刀痕五敵退以

功陞大同總兵官掛征西前將軍印四十一年戰於湯其河斬獲甚衆璽書褒美賚金幣廕一子百戶上表請代及歸里屢徵不出卒於家子顯宗顯祚皆有名

延綏志

崔鏞字汝洪其先潁上人始祖程以義勇從太祖征建昌有功授榆林百戶世襲鏞嘉靖中進士授潞安府推官決獄多所平反遷戶部主事督昌平薊門餉尋陞山西按察司僉事分巡陽和進副使隆慶四年俺荅孫把漢那吉來降俺荅叩邊求還總督王崇古巡撫方逢時屬鏞議鏞曰殺降固不可還之則又示弱莫若以那吉歸義上聞爵以官俺荅必喜使其貢欸還我叛人然後予之於計便即單騎往諭之俺荅聽服上多鏞功錫以金帛改井陘道萬曆中又改岢嵐道時俺荅初進貢一切簿期皆鏞所手定進都察院右僉都御史巡撫山西會與御史不合自劾罷及歸侍父母色養

備至居家雍睦鄉里皆則倣之以喪父過哀竟得疾卒

延綏志

趙岢榆林人父英爲總兵官岢少以父蔭歷寧夏副將勦邱富有功

陞延綏總兵爲北兵所畏鄜延民來田塞下者日衆黃台吉入掠

岢擊走之復犯高家堡萬騎屯明水湖謀者以告岢令二將將五

千人疾走威武塞見敵乘高結營窺覘虛實岢潛師示弱以驕之

遂突出精兵奮擊敵敗而遁後東勝之圍岢提師往援敵遙見旌

旗便散走岢多勇畧善鼓士氣故每向有功于孟麟官總兵

延綏志

劉鳳池渭南人嘉靖中進士有文武才任兵部主事贊畫軍務將士

多授成算邊塞克定未幾以疾卒隆慶中沔縣舉人張日新任兵

曹亦以參贊軍務著名

賈志

張臣榆林人趨捷精悍好搏戰陷堅由隊長立功知名隆慶初土蠻

大入畿北援師皆坐視臣獨力戰斬馘甚衆萬曆時歷寧夏總兵

俺答畏其威無敢譁朶顏擾邊移鎮薊朶顏憚懼乞降進都督同知再鎮固原甘肅火落赤犯洮河套酋助之臣大挫其衆酋慟哭遠遁經畧鄭洛主欸議與臣左乞歸臣善撫士卒更歷四鎮名著

塞垣

延綏志

魏學會字惟貫涇陽人嘉靖中進士授戶部主事歷員外郎郎中有權璫爲商人乞支芻糧鉅萬大司農業許之學會執弗與督餉宣府適敵騎薄城守者不知所出學會遽攝戎衣乘城指授方畧敵遁去擢光祿少卿尋拜僉都御史撫遼東晉右副都御史尋以疾告起兵部右侍郎改吏部時新鄭江陵同在政府皆倚重學會會二相失歡新鄭策免廷臣失色學會大言曰上踐祚甫數日首逐一顧命大臣詔草出何人手不可不明示百官衆爲凜然朝罷更要九卿詣江陵所江陵稱病謝客新鄭遂行江陵嗾言者劾之歸

江陵敗起戶部侍郎歷尚書又數年西北羽書急詔督陝西三邊
軍務屢辭不獲移書政府罷欵議戰至固原明莊二部各擁衆數
萬擾邊三戰三北之斬明安莊走獲其部落五百餘級晉太子少
保哮拜父子殺撫道據城叛學曾發檄偽撫以緩之潛檄各鎮徵
兵餉自統大軍駐靈州以偏師駐花馬鳴沙諸要害兵餉四集進
師薄城下障水圍之城中懼學曾曰此可以行間矣乃射書城中
疑之居民多受計爲內應言官交章以偽撫緩兵罷學曾易督未
幾哮氏黨自相殺門啟師入哮氏闔室自焚皆學曾本謀也賴縉
紳交訟還官歸里功亦不錄弟學思亦舉於鄉歷寶豐知縣真定
同知所至皆有聲

賈志

蕭如薰延安人以父廕百戶歷寧夏平魯營叅將

延安府志

哮拜作亂以

金帛結河套著力兔犯邊與哮雲攻平魯蕭如薰射殺雲套部亦

引去論功遷署都督同知

明紀輯畧

如薰好義潔已善撫士卒敬賢下

士以故人樂爲用佩大將軍印者九都督京營者三祖漢父文奎

兄如芷如蘭如蕙皆總兵

賈志

劉九韶字應鳳盩厔人性愿謹駢脇多力平地超距丈餘嘗往四方

山別業遇盜遮路九韶從容出尺挺揮擊顛仆如搏嬰兒有行劫

於路者九韶適至盜即棄所掠去九韶令諸被劫者各取所失衆

願分財以酬九韶不許會劇盜曠無徹據西番寨爲亂直指使發

西漢鄖三郡材官征之失利有司以九韶聞乃命叅軍事九韶言

賊據山谷急則死關不如緩之乃陽爲招撫而陰致賊黨楊進甫

令誘無徹來降與之歡飲度其醉乃出壁間壯士三十人擒之并

縛其從騎無遺以功遷土官世守其地

盩厔志

劉承纓字元洲以進士任楚荆司理值容桑構兵岳澧震動承纓深

入開諭威信賊皆投戈帖服嗣寇獫狁荆襄親入施南調集土兵捕
斬以千計南國倚爲長城會以察典改調督撫交章乞留既得請
益身歷疆場累立戰功以積苦行間卒

賈志

李必達字中孚城固人萬曆甲午舉人性倜儻不羣精奇門遁甲歷
官遵義副使天啟間奢賊陷重慶必達畫謀決勝攝服賊衆稱爲
神兵在川十餘年控制有法殘孽不敢逞後罷職川人感慕立祠
祀之

賈志

王宸漢中衛指揮使嫻於韜畧西鄉縣星子山巨寇何勉倡亂宸奉
命征勦奮勇赴敵斬首十五級生擒趙子等二人以功陞本營守

備

賈志

張剛大同總兵堅之子榆林衛指揮累遷神木營叅將多智謀時北
兵大舉入邊剛設奇策挫其鋒而去於河口堡築牆長八里迄今

特為捍衛歷陞固原總兵

延綏志

王保榆林人以行伍起家萬曆十六年任神木副總兵時套中挾賞犯邊保力禦之十九年陞都督僉事鎮昌平調鎮山西復改薊鎮喜峰口有警保奮勇力戰陞都督同知尋調征倭有叛兵聚嘯於石門將為亂聞保至即時解散二十四年回鎮與北兵戰於羅文谷及石塘路皆有功詔以原官掛印鎮遼東於瀋陽前屯諸處屢立戰功以病卒於海州保寬慈得眾盡瘁王事一時稱為名將

志

延綏志

尤繼先榆林人任昌平總兵善騎射愛士士樂為之死後鎮守固原延綏敵不敢犯又鎮薊遼九年加少保其歿也軍中咸西向祭之

延綏志

王威綏德人萬曆時延綏參將從麻貴征河套大挫賊眾進右都督

鎮大同時塞上多事威訓兵飭防邊境晏然前後在邊五十年九

佩將印以功名終威祖孫父子兄弟三世二十四元戎

延綏志

王撫民延安衛指揮使祖鉞河西千戶撫民承襲守靖邊時苦多盜

摘發如神姦宄肅遏累遷保河遊擊綏禦有方畧萬曆元年遷紮

荆叅將旋推石門副總兵尋改涼州涼州逼處番回撫民至募勇

敢三千日訓練待敵常率所部突其圍敵披靡遁去涼州以安十

四年遷都督僉事鎮守陝西嵩山逋寇為亂至即撲滅之火節聞

風不敢犯邊者數年十七年遷右軍都督同知召還京屢疏乞歸

許之未幾復起鎮守山西尋以病卒

延綏志

杜應奎字海宇三水人萬曆癸丑武進士初授遼東清陽守備屢建

奇功天啓中特擢為壩上總兵多謀畧力舉千斤常遇戰臂中矢

刮骨療之色自若有古名將風以讒歸里時流賊寇三水應奎率

蒼頭軍大破之出所擄子女無數一方帖然無警

賈志

孫必顯字克孝潼關人萬曆丙辰進士由戶禮二部郎擢吏部佐侶
侶舉職不少假易有名選郎之遺風小人以計典中傷左遷去涼
賊起必顯以山西按察司經歷量移南祠部急請歸建議設重鎮
以扼關鄉人恤其私以勞師動衆尼之寇自是渡澠池而西莫可
禁禦假滿還留都途出柘城歸德遇賊潰隄而入數十騎薄城引
弓詬詈城中危懼必顯令僉從環射之賊中傷皆散人咸謂必顯
知兵可辦賊也久之由大理寺丞擢兵部右侍郎拜命之日廬兒
戍卒靡不戟手相賀甫一月卒

錢謙益撰墓誌

杜桐字來儀延安人任本鎮總兵以謀勇著稱首功至一千八百官
右都督文煥字改武桐之子時套警方嚴自寧夏總兵遷本鎮戰
多捷以事謝去崇禎二年大盜混天王等掠延川米脂清澗諸縣

復起爲總兵勦之三年邊盜苗登霧嘯聚於安定文煥擊敗之王
嘉引降復叛去走皇甫川引套人入寇文煥從孤山進擊大破之
四年賊首神一魁據保安招套中千餘騎爲亂文煥與賀虎臣合
軍圍之遁去文煥三任榆林賜飛魚寵盛無比子弘域官池州總
兵部伍肅然爲一道最自桐及弘域三世總戎當代稱爲將家

志

李卑字持平榆林人以神木千總屢立戰功陞延安叅將值羣盜四
起以防兵三百破賊數千於甘泉臨陣出奇疾如風雨延以北諸
縣賴之積功擢臨洮總兵勦賊於湖廣所至軍命嚴肅居民不擾
雖倉卒顛沛鎮定如山賊營望見旗鼓即知爲李將軍惜勲未
而卒

延綏志

崔林綏德衛千戶世居榆林卑退自持鄉人或侵其田林推與之守

柏林堡嚴烽堠飭邊防賊不敢犯及隨征奮不顧身以驍勇聞鄉人語曰林居鄉怯臨陣抑何勇也子孫亦勤儉謙厚有家法

延綏志

趙彥膚施人萬曆癸未進士歷官都御史巡撫山東沉敏有智畧平

妖賊有功進兵部尚書

延安志

天啓二年山東妖賊徐鴻儒作亂撫

臣趙彥連戰皆捷未幾賊攻兗州彥親至兗州同總兵楊肇基迎敵殺賊千餘人賊走滕縣賊侯五乞降而鴻儒同黨三百人復力守官兵分攻之彥令鴻儒不出即四面焚攻賊因縛鴻儒降復滕

城加趙彥兵部尚書

紀事本末

鄭學陸字翼宣西安人舉人明季任大治令性慈厚語音和細目眶

微赤即其怒時時盜賊盛起計擒渠魁柯篤生等數十人丁丑峽

山呂瘦子叛獨運方畧統家丁胥役經營聯絡遂不敢犯境與守

道袁繼成協力滅之

湖廣志

孫守法字繩武臨潼人多智謀膂力絕人時流寇猖獗守法仗劍入行伍爲總制洪承疇戎旗健卒每出輒敢當先宜君之戰以單騎擒賊首點燈子不粘泥斬獲甚衆授守備又與賊闖王高迎祥戰於長武迎祥敗棄馬入溝中守法亦棄馬逐之手搏生擒以歸餘賊氣奪授叅將轉陞護藩練營副總兵高傑號翻山鷄雄武有才畧爲賊羅汝才副將守法知其可用單騎入壘諭降之傑感恩誓以死報李自成僭號西京守法獨不屈遁入山中

康乃心撰
孫將軍傳

王應朝韓城人豪俠有氣節膂力絕人明季盜起西川一帶盡爲賊藪應朝直入其營斫殺斬首數級邑令左蘿石嘉其武勇請授千總防禦有功每遇賊戰則所向披靡一以當百七年賊圍澄城應朝同韓邵營兵將勦殺力斬數十級生擒數人雄勇振一時旋爲領兵者忌而殺之蘿石哀之祭以文

韓城志

王之良字虞卿華陰人天啓乙丑進士授中書改御史按畿南巡鹽
長蘆大猾賈大成金吾陳寵因緣爲奸特疏糾劾商人頌之秦中
苦寇甚又值歲凶請帑賑貸復請修華陰城條奏甚悉成報可陞
太僕寺少卿以僉都御史巡撫南贛時猺蠻土寇相煽突勢逼衡
州衡故介虔鎮選將防勦廣東樂昌盜起遣兵往擊俱大捷桂東
林起鳳反下令撫之衆感其誠即投戈降鉛山張晉徽與南豐封
家山妖人各蜂起勢漸合遣兵與江西撫軍夾擊之戰於封山再
戰於韶遂擒晉徽修城練兵天險屹然利器充牣積穀至三十四
萬石有奇連州陽山猺賊起以兵扼隘出入斷其魚鹽連報捷寇
悉平人稱國家設虔鎮百餘年間得兩王公前有文成後有之良
云尋陞南京兵部右侍郎壬午予告歸卒之良性溫和淵靜有休
休度每從三原溫純長安馮從吾遊淹通典籍而以自得爲宗

許國翰字柱宇涇陽人崇禎戊辰進士授儀封令歷任岳州道練水
兵焚賊船洞庭積寇一清及爲克東兵河道倣用武剛車駕鴛牌
之法戰守有備其防河兵參用鄉勇厚其賞給以故人有固志時
寇賊剽掠而克東晏然皆翰力也終山西按察使

涇陽志

陳繼泰字憲字涇陽人崇禎癸酉舉人都察院司務慷慨慕義少年
多遠畧明季賊亂破產糾義旅數出奇勝之賊始遁去閭里恃以

安堵

涇陽志

單興詩興安舉人明末賊犯興安興詩與州守協力守禦臨機畫策
出人意表又洋縣舉人黃路清勇敢有方畧流賊薄城下路清率
鄉人登陴守禦城賴以全

賈志

按秦中氣秉金精星占井鉞地險固而俗武勇故歷代謀臣戰
士秦產爲多今取其勲名顯赫者列傳於左至聞望素著事蹟

未詳如元則有楊子江三原人封莊武伯明則有陳輝延安人
官總兵岳可延安人官副將官秉忠榆林人官總兵劉國鏞榆
林人官總兵袁聰榆林人官叅將孫鑑潼關人官指揮使孫士
英宜君人官守備戴欽綏德人官總兵傅鍾綏德人官叅將王
道純蒲城人官山東巡按皆附其姓名官爵於後以見關西之
多將材焉

本朝

梁加琦安塞人入籍三原沉勇有謀夙嫻韜畧順治元年以將材
隨征充前鋒取太原陝督孟喬芳薦授遊擊三年

王師征蜀加琦運餉有勞晉副將十七年率兵攻川東擒斬賊將
陳貴榮等康熙元年臺議設蜀中總統彈壓兩川加琦以威望
授是職勦平山西逆寇五年攻太昌賊袁宗第有擣巢功復招

降僞新化伯馮起鳳等是年冬又大合諸軍進勦賊黨於巫山賊首劉二虎自縊捷

聞晉秩有加子世勲以父廕歷官戶部侍郎

高第字漢冲榆林世族也順治初大兵下河南第由西路進兵駐洛所到風靡尋奉

命總鎮河南開歸三府駐節於襄累加少保兼太子太保

賜蟒玉初至襄時縣令佟某未任第見城垣傾圯即捐金督將士分汛修築城以完固恐下情難達於城樓立鳴冤鼓令屈抑者擊之輒為伸理節制營將即親故不少貸性好施捨每設粥廠茶棚立藥局給貧生膏火資修古寺觀無虛日以及祭蝗祈雨無不立應至於撫開歸河南南陽等府州縣五十一城招營頭一千五百四十六寨勦陳蛟諸寇發金逆僞札曹之役身親堵殺

陽西志卷之二十一
姜之變輿疾從軍尤其赫赫者

張天祿榆林人明末以義勇從軍初隸賀人龍及曹變蛟從勦流賊有功歷陞池浦總兵官豫王南下上其籍於幕府衣資器械如山積以招撫江南功陞蘓松提督時海寇出沒天祿撫勦兼施威惠並行降者接踵坐鎮十年增秩

賜金蔭阿思哈尼哈番世襲天祿性忠勇樂善好施尤能禮接儒雅時比之杜征南云

黃應傑榆林衛人順治四年任惠州總兵官鎮嶺東平長寧劇盜會寇圍興寧軍書告急應傑兼程至縣安營未定即馳三騎衝賊壘賊大潰斬獲無算八年興寧復亂提兵營於城西赤荂嶺平定安集寧人德之

張鵬程字雲圖榆林人由行伍從高傑於江南順治二年豫王南

畧鵬程率先歸附授寧國副將以招撫江南功授二等阿達哈番世襲時江南初定鵬程多方綏輯反側潛消十一年擢偏沅總兵官李定國兵犯常德都統蘓克薩哈自荊州來援鵬程列艦濟師夜襲其營更設伏以要之定國兵潰十七年

王師進取滇黔廷議欲得威望大臣鎮撫其地因調駐鎮遠康熙元年移駐安順府會水西安坤不靖奉

命與吳三桂會師進勦師次六廣安坤遣酋岔搭拉率衆來襲約兵至舉火即斷橋以覆我師於江鵬程偵得之乃伏精兵於五里坪守橋爲固仍舉火誘致之岔搭拉馳至陷伏中擒之遂連營而進次日克水西與三桂兵會於時勦撫兼施山無伏莽始議改建流官設威寧等四府治水西悉定初鵬程身經百戰屢被重傷至是血氣向衰創疾間作遂乞歸既歿

聖祖軫念勞臣卹典特優祭葬如制

許鴻翔榆林人順治初知葉縣時撈河土寇作亂勢張甚鴻翔躬
擐甲胄率鄉勇搗巢滅賊而還捷

聞紀功民賴安堵

許占魁字文元蒲城人順治二年大兵南下占魁以招撫蘓杭功
授陽平關叅將時獻逆雖除全蜀猶梗六年從定西將軍梅勒
根入蜀襲僞侯趙榮貴破其軍復出碧魚口設疑兵以遮賊後
餘衆悉降十一年遷山西平陽副將巨寇張武等久肆劫掠占
魁先分兵守諸隘口簡精騎二百親將之乘風雪入山中擒武
等以出晉地悉寧康熙九年陞延綏鎮總兵官十四年朱龍叛
進逼榆林遣逆黨投以僞劄占魁立集文武僚屬發其事事
聞特授都督同知時緣邊城堡相繼報陷鎮兵先因蜀警被調軍

久虛占魁與遊擊謝鴻儒等誓衆固守三閱月不懈會平逆將軍畢力克兔以禁旅來援又總督哈占遣叅將楊宗道遊擊王宣懿等進勦援兵四集朱龍伏誅惟東路神木未下占魁督兵圍之遂乞降捷

聞授世職拜他喇布勒哈番襲二次鴻儒擢延安營叅將宗道宣懿俱陞賞有差十六年卒贈太子少保謚恪敏占魁長子登隆年甫冠值朱龍之變請於父夜縋而出詣

闕面陳賊勢及鎮城被圍狀甚悉賊平補鴻臚寺少卿歷雲南臨安知府巨盜朱六非以妖術煽亂登隆至立平之五十二年卒官李吐馨同官人順治二年任靈邱典史適大同姜瓖叛逆土寇蠭起令其恇怯無才能吐馨招集鄉勇示以大義兵民咸感泣禦寇城賴以全

冠徽音字繩之同官人由行伍授山西都司再擢河南叅將時嵩
洛間多嘯聚徽音出奇計悉獲之又折節下士論交多寒素值
歲凶諸儒咸賴其賙恤後遷長沙副將卒於官

陳躍馭城固人以從軍功授關南道中軍守備順治三年冬勦黑
水峪得賊首高勲以歸四年隸寧夏總兵劉芳名勦馬德五年
勦李彩六年勦王永強勦劉弘才俱有功制府孟喬芳知其忠
勇可任拔授遊擊康熙元年隨征雲南三年閏六月奉檄守天
生橋招徠賊首彭長庚等旋令搜箐平化仲硎平蔡家硎平值
金平歸龍硎躍馭先登陷陣斬獲無算四年五月大兵進討水
西躍馭率衆次涖列遇賊戰大捷復分兵攻牛鼻硎匝月賊出
降功

恩議叙八年陞四川松潘東路叅將十一年卒官

吉允迪字太邱洋縣人順治己丑進士夙嫻兵畧授信豐令時議
勦安遠砂含賊允迪練鄉民於新田賊謀從他道乘虛劫城迪
偵知之夜伏精兵隴頭俟賊至突出擊之賊大敗壬辰九月復
奉檄勦黃石砦賊先是副將楊栗賈三榮久戰無功迪至諭以
皇靈遐播賊遂降歷官雲南叅政貴州學道所至皆有實政居鄉尤
好周恤人有鬻子女者輒爲捐貲代贖鄉黨賴焉

楊文啓西鄉人性忠勇善兵法衝鋒克敵屢立奇功屢擢至川北
鎮總兵官卒

賜祭葬

馬文秀城固人由行伍積功至臨安鎮遊擊時滇省初入版圖人
心未洽康熙三年二月土目王朔等偵知總兵閻鎮赴水西即

率衆襲城城守者來告急鎮未發文秀曰城困於賊而不救不可請先之即倍道疾馳而進既至尾賊後賊方盛氣攻城期必克城中胥役皆黨賊謀開城出應文秀以奇兵急擊之城中共知救至因大譟出攻賊潰會闔鎮兵亦至氣益奮越八日賊糾集諸蠻衆復大進鎮督軍出戰文秀阻之曰賊氣方張我師輕出將不利宜以計取之鎮不聽果敗越三日賊攻益急鎮大恐文秀起曰賊驕矣衆心必懈可擊之選城中得二千人戒之曰賊所恃者剽弩也疾逼之則弩不及發技窮矣且戒城中人兵出即下鍵無令出戰者懷退志即引兵張左右翼出擊文秀策馬先登諸軍殊死戰賊大敗走遂進兵霧露結盡傾其巢穴而還提

聞進副總兵以疾歸卒

劉永亨字正吾榆林人年十八以勇力聞補青泉鵬鶚諸堡守備累官至都督僉事協守紹興時浙東多土寇蔓延上虞餘姚新昌諸縣永亨將兵勦撫所至風靡捷

聞

特賜貂裘名馬遷宣府總兵晉都督同知掛鎮朔將軍印復

詔關內昌平密雲諸軍悉隸宣鎮節制永亨至鎮繕修龍門滴水崖諸城堡關門屹然烽燧偃息年六十五卒

賜祭葬

張玉麒鵬程子少習韜鈴康熙九年襲世職授直隸保定叅將十四年秋新河張可大變起畿甸遠邇煽動巡撫金世德集衆議未定玉麒潛師夜起以百騎破可大萬衆往返僅五日事

聞進二階尋改陝西定邊副將以罣誤歸里再起山東沂州副將三

十四年陞温州鎮總兵官嚴明有紀律尋復移鎮臺灣臺灣遠隔重洋宿多伏莽三十八年春吞霄社土番叛鷄籠淡水二澳復聞風效尤玉麒選將厲兵直抵吞霄擒卓奇卓霧尸諸市更授計二澳汛官縛其渠俱斬之海疆自此寧謐四十一年調福寧鎮尋署福建全省陸路提督印務在鎮凡十二年

賜御書匾額者三曰機宜果斷曰奕世承休曰世澤堂皆異數也石光玉榆林人登武科康熙十四年朱龍據定邊叛陷郡城榆林大震光玉倡義與靈州訓導李龍雯平利訓導艾士彥連九卿等率士民守之城賴以全

王維威富平人任江西石城典史康熙十三年城被閩逆圍攻維威視事甫三日與照磨李德明協力守禦晝夜登陴二旬乃解十五年劉應麟兵至城下維威與戰破之嘗巡城矢中臂弗爲

動三載寇始平卒保危城維威實有力焉

陳範富平人康熙丁未武進士授守備擢廣東碣石鎮遊擊十九年二月海寇犯甲子所擊敗之三月進征海山島百洲島四月征磊門五月征甌汀背海口俱有功賊首鄭鴻儒遁南澳二十一年大兵平臺灣沿海悉定論功除甘州城守叅將二十八年陞汀州副將巨盜朱紹嘯聚龍門山永定歸化諸縣大擾範率兵搗巢一鼓平之民賴以安尋卒官

蘭泗耀州人由將材授湖廣興國叅將康熙十二年陞直隸三屯營副將未赴因吳逆據長沙調駐武昌十三年進勦岳州又檄討黃金龍戰於大冶之換綵橋殲賊殆盡獲馬騾器械無算軍威大振十四年還任薊協兼攝通協事十八年特擢荊州左路總兵時逆黨未靖泗旌麾所指屢立奇功克思南復龍泉凡導

義綏陽桐梓等處一時蕩平改鎮安籠安籠地界滇粵巨寇窟穴其中最稱險要泗安內撫外四境帖然在鎮十有六載

予告歸

尚宣長武人生而英毅既長偉貌長軀膂力絕人康熙十三年王輔臣從逆叛兵四起長武孤城無援宣父子倡衆固守城以無恙明年二月賊將周養民吳占春復率兵圍長武宣潰圍請救賊始遁十六年授固原叅將固鎮武備久弛宣整飭一新又鎮城外舊有逼水城一道歲久傾圯夏秋遂多水患宣捐俸修築屹然完固十八年奮威將軍王進寶兵取漢中宣先登拔二里關掃煎茶坪恢鳳縣下兩當叙功爲軍鋒冠二十二年陞副將以累誤左遷陝西陽平關叅將陽平爲川蜀間道姦宄出沒不常宣創建望江樓又多置漁舟網具每登高覽勝即命卒沿流

舉綱下止川原宵小遁跡三十二年陞洞庭水師副將尋調澎湖營調膠州營調三屯營三十七年以署都督僉事充宣化鎮掛印總兵官

駕幸熱河宣頻歲迎謁蒙

賜撫訓安重匾額復渥疊加四十二年加提督仍管總兵官事又三年予告歸卒

殷化行字熙如其先晉人徙咸陽幼撫於王從王姓舉康熙庚戌武進士吳逆叛總督哈占題補火器營守備十五年從撫遠大將軍圖海收復川陝積功授三屯營副將二十六年擢臺灣總兵官先是臺灣議築城未決化行至令所部人各致樹一株數日而木城成更令諸部各製木城以相犄角居三載移鎮襄陽復移鎮寧夏三十四年冬

土親征厄魯特令化行兵偕大將軍費揚古出西路次年二月出師
四月至郭奪力五月己未師次土喇河聞噶爾丹西遁戊辰至
召木多地平廣約數里南向有小山方連營而進適偵知賊已
在山下化行力主先據小山於是麾兵先登甫至巔賊已大集
化行令士皆下馬坐發礮疊擊之賊亦捨騎而鬪氣方張化行
密告大將軍曰賊陣堅宜於山下遣一軍衝其脇又賊陣後士
馬甚盛而游兵不戰是輜重也往劫之必亂大將軍然之俄所
遣兩軍俱薄賊化行乃鼓兵而前飛矢雨下呼聲震山谷賊大
潰噶爾丹僅以身遁化行復具疏請率師深入務殄根株疏至
時

車駕已至寧夏

賜御書深沉節制匾額閏三月復從出塞會噶爾丹勢窮死乃旋師

論功

特授世襲拖沙喇哈番尋提督廣東軍務既至平翁源長寧及瓊州諸賊最後乃議平連陽徭既得請與總兵劉虎分道進攻直逼徭穴諸徭震駭而遁其東路一師失律副將林芳夜失道墮澗死化行勒兵再進徭始面縛乞降廷議謂化行總統宜坐遂以原官世職致仕化行淹貫文藝軍中時手一編恬吟若諸生家居後以詩酒自娛綽有古儒將風

李麟字振公其先延安人徙咸陽弱冠從勇畧將軍趙良棟南征以平滇功加守備再以功授張家口遊擊尋擢化林營叅將時打箭爐蠻人恃險不服麟至即列狀請討盡平之陞副將尋陞總兵會大兵西討奉

旨赴軍前議政區畫調遣悉中機宜賊將車令敦突踞中藏麟力疏

請進兵長驅至通天河編筏爲渡前抵博克麟與諸將謀曰我師深入且遠來疲敝賊必乘夜襲我盍備之已而賊果至陷伏中斬獲無算其後再戰再捷賊益懼又以計誘賊將疑襲日生車令敦敗走因護送捷賴喇嘛歸國師還授提督固原軍務雍正元年入

覲奏對稱

旨授內大臣鑾儀使世襲拜他拉布勒哈番以年耄乞歸

馬如龍字見五綏德州人父光祜與弟光稷皆諸生優文行尤善教子弟光稷子仲融順治丙戌進士爲固始令有聲如龍少倜儻多大畧康熙壬子舉於鄉會三方便化朱龍倡亂十四年四月延安陷州城失守如龍糾集鄉勇據山立寨遠近團結者復千餘家軍聲大振賊至屢却之賊遣使啗以僞劄如龍手刃去

使以狗賊益憤爲長圍以困之如龍誓衆死守悉無異志五月
平逆將軍畢力克兔兵至永寧未即進會賊退如龍馳使至軍
期六月四日濟師至期如龍揚兵出河上謁軍門陳破賊方畧
因統前鋒追賊大破之朱龍走定邊畢力克兔即署如龍本州
牧以撫定其地越月延安平幕府上其功改授灤州知州屢遷
杭州知府二十八年

車駕南巡超授浙江按察使海寇潘三假貿易謀不逞設策擒治殲
其首從六人進浙藩擢江西巡撫三十八年奉

詔陞見

御書老成清望堂額以旌之四十年卒於官

賜葬祭再

賜績著西江匾額哀榮之典稱極備云

張其蘊鎮番衛人徙居長安康熙十四年由諸生從征吳逆積功授辰州水師營守備二十二年征紅苗二十七年討夏逆俱有功歷陞神木副將改慶陽四十六年擢雲南臨沅鎮總兵官雲南自孫李竊踞之後民戶流亡我師入滇即以從征者分駐其地既而生齒日繁糧仍故額軍有艱食之苦其蘊糴穀捐金分駐三營曰義穀義金自此婚喪有資軍不告匱五十三年臨大饑市中糧絕其蘊移檄牧宰發官米萬餘石置四城計時計口減價以糴四閱月所全活無算五十五年卒於官祀名宦祠

